



## 賣藥仔

「廣告」佇較早的閩南語叫做「賣藥仔」。電視無遐發達的時代，三不五時暗頓食半飽，就聽著規逝巷仔放送的聲，「食飽趕緊來大埕，阮有好空的報你看」。這時阮遮的囡仔兄、囡仔姊，手捧飯碗，飯猶未食煞，心早就飛飛出去矣。阮聽著鑼鼓響連天，偷影著電火光映映(kng-iànn-iànn)，飯就清彩扒扒咧，毋管阿母桌頂攢啥。當欲出門，囡仔伴拄好來相招，探頭對阮兜看，濟人較有伴，就一行三五名，穿淺拖仔、擰椅頭仔，三步做兩步行，趕欲去搶頭前的好位啦！

去到空地仔遐，人早就映甲洩洩、滿滿滿。逐家那講那笑，目睭那金金看，耳空那斟酌聽。頭家銅鑼損三聲，拄開喙攏是「小弟來到貴寶地，毋是欲拍拳賣膏藥，是有好空的欲報恁知，予恁買會著，俗有著，買袂著，心肝會礙虐……」逐家聽甲信信信，這馬想來，分明是頭家愛食假細膩，枵鬼假無意。囡仔看台仔頂唱歌的搖咧、搖咧，就鬥鬧熱，綴咧共嘆仔聲催落去。有當時仔個會變把戲。等唱煞、演煞，頭家就開始賣藥仔。這就是我細漢理解的「廣告」。莫怪，1970年代有電視了後，逐家嘛慣勢共節目內底的廣告時間，叫做「賣藥仔」。

彼當陣的電視廣告，『báng-gà』無賣藥仔，會賣『乖乖』恰『謝謝』樹奶糖。其他的節目，有影是賣藥仔較濟，捷看嘛攏會曉背矣，毋過囡仔人是袂去買藥仔啦！就按呢，賣藥仔的時間，就有其他的路用。阮兜較散，小學猶無電視，攏是欲暗仔去阮同學阿弟仔個兜看『báng-gà』恰歌仔戲。逐工準時去看，看甲個阿媽講，叫我規氣予個做新婦。我聽著足歹勢，毋過為著欲看電視，我嘛是牢佇遐。等到賣藥仔的時間，我會假無意小出去咧。彼時賣藥仔就是賣我救命仙丹。

後來，阮兜買一台中古的、烏白的電視，若搬到賣藥仔的時間就足濟代誌通做囉！國中、高中愛聯考，為著消除看電視的罪惡感，我就趁賣藥仔的時間緊背冊，無就是第一節的賣藥仔去承水，第二節去洗頭，第三節去洗身軀。若親像咧做兵，跤手足緊，時間閣算甲峇峇，這馬想著誠恐怖。到大學讀外文系，我迷著電影，閣因為蹣學校的宿舍，無電視通看，煞變做毋知電視廣告是咧賣啥麼膏藥矣！

作者：王秀容

### ☆詞彙學習☆

【一行三五名】tsit kiànn sann gōo miâ：指

一行人約有三五人同行。

【洩洩】khó-tsùt-tsùt：形容人非常多，

既不便穿越，也不易前進。

【椅頭仔】í-thâu-á：凳子。

【催】tshui：促使行動。

【樹奶糖】tshiū-ling-thng：泡泡糖、口香糖。

【承水】sîn：接水。

【峇】bā：密合。